

PERSPEKTIF ISLAM DALAM MENDEPANI ISU ORANG MENGALAMI GANGGUAN MENTAL MASUK KE DALAM MASJID

Pengenalan

Orang yang mengalami gangguan mental atau gangguan jiwa adalah orang yang tidak mampu mengawal tindakan atau memahami akibat perbuatannya. Dalam konteks Islam, isu orang yang mengalami gangguan mental memasuki masjid perlu ditangani dengan hikmah memandangkan masjid adalah tempat ibadah yang suci, tetapi Islam juga mengutamakan rahmat dan belas kasihan terhadap golongan lemah. Rasulullah SAW mengajarkan sikap lemah lembut terhadap mereka yang memerlukan, selari dengan prinsip menjaga kehormatan manusia tanpa mengabaikan adab dan kesucian masjid.

Orang Yang Mengalami Gangguan Mental Masuk Ke Dalam Masjid

Masjid adalah tempat yang suci dan dihormati dalam Islam. Ia bukan sahaja berfungsi sebagai tempat ibadah, tetapi juga sebagai pusat sosial dan tempat berkumpulnya umat Islam untuk mengeratkan ukhuwah dan silaturahim. Oleh itu, setiap tindakan yang berlaku di dalam masjid hendaklah mematuhi adab-adab yang ditetapkan oleh syariat. Berdasarkan kepada firman Allah SWT:

﴿ فِي بُيُوتٍ أُذِنَ لِلَّهِ أَنْ تَرْفَعَ وَيُذْكَرَ فِيهَا أَسْمُهُ وَيُسَبِّحَ لَهُ فِيهَا بِالْغُدُوِّ وَالْآصَالِ ﴾

Maksudnya: Di rumah-rumah ibadat yang diperintahkan oleh Allah SWT supaya dimuliakan keadaannya dan disebut serta diperingati nama Allah SWT padanya; di situ juga dikerjakan ibadat mensuci dan memuji Allah SWT pada waktu pagi dan petang.

[Surah al-Nur: 36]

Berdasarkan ayat tersebut dapat difahami bahawa masjid merupakan satu tempat yang mulia di sisi Allah SWT dan menjadi suatu tuntutan kepada kita untuk menjaga kesuciannya daripada segala perkara yang boleh membawa kepada kerosakan.

Dalam konteks isu yang tular baru-baru ini, terdapat seorang lelaki yang dikatakan mengalami gangguan mental telah memasuki masjid dan menyebabkan kekacauan berlaku. Setelah menekuni isu ini, maka di sini kami suka berikan ulasan dengan didatangkan sebuah hadis yang diriwayatkan daripada Wathilah bin al-Asqa' r.anhu, bahawa Rasulullah SAW bersabda:

جَبُّوا مَسَاجِدَكُمْ صِبْيَانَكُمْ، وَمَجَانِينَكُمْ، وَشِرَاءَكُمْ، وَيَبِعَكُمْ، وَخُصُومَاتِكُمْ، وَرَفَعَ
أَصْوَاتِكُمْ، وَإِقَامَةَ حُدُودِكُمْ، وَسَلَّ سُيُوفِكُمْ، وَاتَّخِذُوا عَلَى أَبْوَابِهَا الْمَطَاهِرَ، وَجَمَرُوهَا فِي الْجُمُعِ-

Maksudnya: Jauhkanlah masjid-masjid kamu daripada kanak-kanak, orang gila, berjual beli, pergaduhan, kebisingan, pelaksanaan hukum hudud dan menghunuskan pedang. Letakkanlah di pintunya tempat bersuci dan harumkanlah masjid itu pada hari-hari Jumaat.

[Riwayat Ibn Majah 750]

Daripada teks hadis di atas dapat difahami bahawa baginda Nabi Muhammad SAW melarang orang yang mengalami gangguan mental daripada memasuki masjid. Namun, para ulama berpendapat bahawasanya larangan tersebut bukanlah bermaksud mengharamkannya tetapi ia **dihukumkan makruh**. Di antara hikmahnya ialah untuk menghindari daripada mencemari kesucian masjid yang mungkin dilakukan oleh mereka. Hal ini bertepatan dengan apa yang disebutkan di dalam kitab *l'lam al-Sajid fi Ahkam al-Masajid* karangan Imam al-Zarkasyi:

يكره إدخال البهائم والمجانين والصبيان الذين لا يميزون المسجد من غير حاجة مقصودة ، لأنه
لا يؤمن تنجيسهم المسجد

Maksudnya: Dimakruhkan membawa binatang, orang gila, dan kanak-kanak yang belum boleh membezakan (antara yang baik dan buruk) ke dalam masjid tanpa keperluan yang mendesak, kerana dikhuatiri mereka akan mencemarkan masjid. [Rujuk *l'lam al-Sajid fi Ahkam al-Masajid*, hlm. 312]

Walaupun Imam al-Nawawi meletakkan larangan itu secara mutlak tanpa menyatakan sebab larangan tersebut, namun Imam al-Zarkasyi menjelaskan dengan menyatakan:

وأطلق النووي في الروضة المنع من دخول الصبيان والمجانين المسجد. وهو في المجانين ظاهر، إذا
خيف منه تلويثه أما مع الأمن والتمييز فلا

Maksudnya: Imam al-Nawawi dalam *al-Raudhah* menyebut secara umum larangan membawa kanak-kanak kecil dan orang gila masuk ke dalam masjid. **Larangan terhadap orang gila adalah jelas sekiranya ditakuti mereka mencemarkan masjid. Namun, jika mereka terhindar daripada mencemarkannya dan tamyiz (mampu membezakan antara yang baik dan buruk), maka tidak mengapa mereka memasukinya.** [Rujuk *l'lam al-Sajid fi Ahkam al-Masajid*, hlm. 313]

Oleh itu, menjadi kewajipan bapa, penjaga atau wali untuk memerhati anak atau orang yang di bawah jagaan mereka (termasuk orang yang mengalami gangguan mental) daripada memasuki masjid dan sentiasa bersama mereka serta memantau pergerakan mereka ketika berada di dalam masjid supaya dapat dihindari daripada perbuatan yang boleh mencemarkan kesuciannya. [Rujuk *I'lam al-Sajid fi al-Ahkam al-Masajid*, hlm. 313]

Sekiranya terdapat tingkah laku yang mencemari kehormatan dan kesucian masjid, maka perlulah penjaga atau wali mereka dengan kadar segera membawa mereka keluar dengan cara yang lembut dan baik dengan mempertimbangkan bahawa mereka ini adalah daripada golongan orang kurang upaya.

Di sini kami sarankan tindakan yang boleh diambil oleh pihak berkenaan bagi menangani situasi tersebut;

- a) **Bertindak dengan adab dan akhlak yang baik:** Jika orang yang mengalami gangguan mental memasuki masjid dan tidak menyebabkan gangguan kepada jemaah yang bersolat dan beriktikaf di situ, maka hendaklah disantuni secara baik. Namun, jika individu tersebut menunjukkan tingkah laku yang mengganggu ketenteraman jemaah, maka langkah berakhlak perlu diambil iaitu dengan memberikan nasihat dan tunjuk ajar yang baik dengan menggunakan bahasa yang lunak dan baik, tidak menengking dan tidak bercakap kasar. Sekiranya mereka menunjukkan sifat yang agak agresif, maka tangani dengan hikmah tanpa melibatkan kekasaran kerana mereka adalah golongan yang perlu disayangi dan bukan dibenci. Tindakan sedemikian diambil berdasarkan contoh daripada sunnah Nabi SAW yang ditunjukkan dalam satu peristiwa yang direkodkan dalam hadis berikut:

نَحْنُ فِي الْمَسْجِدِ مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ إِذْ جَاءَ أَعْرَابِيٌّ فَقَامَ يَبُولُ فِي الْمَسْجِدِ فَقَالَ أَصْحَابُ رَسُولِ اللَّهِ صَلَّى اللَّهُ عَلَيْهِ وَسَلَّمَ مَهْ مَهْ . قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ " لَا تُزْرِمُوهُ دَعُوهُ " . فَتَرَكَوهُ حَتَّى بَالَ . ثُمَّ إِنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ دَعَاهُ فَقَالَ لَهُ " إِنَّ هَذِهِ الْمَسَاجِدَ لَا تَصْلُحُ لِشَيْءٍ مِنْ هَذَا الْبَوْلِ وَلَا الْقَدْرِ إِنَّمَا هِيَ لِذِكْرِ اللَّهِ عَزَّ وَجَلَّ وَالصَّلَاةِ وَقِرَاءَةِ الْقُرْآنِ " . أَوْ كَمَا قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ . قَالَ فَأَمَرَ رَجُلًا مِنَ الْقَوْمِ فَجَاءَ بِدَلْوٍ مِنْ مَاءٍ فَشَنَّهُ عَلَيْهِ

Maksudnya: Ketika kami berada di masjid bersama Rasulullah SAW, tiba-tiba datang seorang Arab Badwi lalu berdiri untuk buang air kecil dalam masjid. Para sahabat Rasulullah SAW menggertaknya, tetapi Rasulullah SAW bersabda, "Janganlah kamu menghalangnya, biarkan dia selesai buang air kecil terlebih dahulu." Maka mereka (para sahabat) membiarkan orang tersebut sehingga dia selesai buang air kecil. Setelah itu, Rasulullah SAW pun menasihatinya, "Sesungguhnya masjid ini tidak sesuai untuk buang air kecil dan kekotoran, masjid adalah tempat untuk zikir, solat, dan membaca al-Quran." Atau sebagaimana

maksud sabdaan Nabi SAW. Setelah itu, Nabi SAW memerintahkan seseorang untuk mengambil satu baldi air dan menyiramnya.

[Riwayat Muslim 285]

Melalui hadis ini dapat difahami, akhlak yang dipamerkan oleh Nabi SAW yang tidak memarahi atau bersikap kasar kepada seorang Arab yang buang air kecil di dalam masjid patut dicontohi. Betapa rahmah sikap Nabi SAW kepada orang tersebut walaupun mengetahui dia telah melakukan kesilapan mengotori rumah Allah SWT yang merupakan semulia-mulia tempat di muka bumi.

- b) **Meminta bantuan pihak berkuasa:** Jika keadaan sudah tidak dapat dikawal dan membahayakan keselamatan jemaah atau individu tersebut, pihak pengurusan masjid boleh meminta bantuan pihak berkuasa bagi menyelesaikan isu tersebut. Ini bagi memastikan situasi tersebut tidak mencetuskan masalah yang lebih besar. Pasti nya pihak berkuasa yang telah dilatih dengan situasi tersebut dan berkemahiran mampu menyelesaikannya dengan berbagai cara yang berhemah dan baik.

Kesimpulan

Tuntasnya, dihukumkan makruh membawa atau membenarkan orang yang mengalami gangguan mental untuk memasuki masjid berdasarkan dalil-dalil daripada hadis serta kenyataan para fuqaha kerana dikhuatiri mereka akan mencemarkan kehormatan dan kesucian masjid. Namun, dalam keadaan terdesak seperti tidak ada sesiapa yang menemani dan mengawasi mereka di luar masjid, maka diharuskan untuk membawa mereka masuk ke dalam masjid tetapi pergerakan mereka mestilah dipantau oleh waris atau penjaga supaya dapat menghindari mereka daripada melakukan perbuatan yang boleh mencemarkan kesucian masjid. Sekiranya orang yang mengalami gangguan mental masuk ke dalam masjid dengan sendiri serta membuat kekacauan atau gangguan di dalam masjid, maka hendaklah dikeluarkan mereka dengan cara yang baik dan berhikmah.

Disediakan oleh;

Unit Buhuth, Bahagian Fatwa,
Jabatan Mufti Negeri Pulau Pinang
Januari 2025